

“Cara yang benar untuk maju dalam kebajikan yang suci adalah dengan bertahan dalam keceriaan yang suci”

Santo Philip Neri



Ayat Suci Minggu ini:

2 Tawarikh 36: 14-16, 19-23

Mazmur 136: 1-6

Efesus 2: 4-10

Yohanes 3: 14-21

2 Tawarikh menunjukkan pandangan yang menyedihkan, dengan orang-orang pilihan *menambahkan ketidaksetiaan kepada ketidaksetiaan*. Mereka melakukan segala macam perbuatan keji, dan tidak mengindahkan amaran utusan-utusan Allah. Hukuman yang dahsyat jatuh ke atas seluruh rakyat, dan Bait dan istana dihancurkan. Mereka yang terselamat dibuang ke Babylonia. Di sana, orang buangan mengeluh; mereka duduk di tepi sungai dan menangis. Bertahun-tahun kemudian, Allah mengutus Raja Koresh untuk membebaskan mereka, menghantar mereka kembali untuk membina semula kehidupan mereka dan Bait. Mereka mendapat peluang kedua untuk memperbaiki keadaan!

Tema teks Injil ialah Yohanes 3:16 – Allah begitu mengasihi dunia ini sehingga Dia telah mengaruniakan AnakNya yang tunggal, supaya setiap orang yang percaya kepadaNya beroleh hidup yang kekal. Raja Koresh mempunyai misi penting untuk membebaskan tawanan. Tetapi injil memberitahu kita bahawa Yesus datang untuk semua orang. Rencana penyelamatan Allah terbentang apabila Yesus memberitahu Nikodemus *Anak Manusia mesti ditinggikan, sama seperti Musa mengangkat ular di padang gurun*. Agar Anak ditinggikan dan masuk ke dalam kemuliaan BapaNya, Yesus mempersiapkan diri untuk Salib.

Adakah kita bersedia menerima kasih Allah? Santo Paulus memberitahu, walaupun kita mati dalam pelanggaran kita, oleh kasih karunia, kita telah diselamatkan melalui iman. Apa yang Tuhan minta daripada kita adalah untuk menjalani kebenaran. Untuk berpaling dari kegelapan dan berjalan ke arah terang. Apabila kita melakukan itu, dan hidup dalam integriti, kebaikan Allah bersinar melalui kita. Kita akan dipanggil garam bumi, dan terang dunia. **Kita boleh menjadi alat Tuhan seperti Koresh dan Musa, yang memimpin umat Allah keluar dari kegelapan kepada terang.**

Bersukacitalah, hari ini Minggu Laetare. Bergembiralah ketika kita meneruskan komitmen Prapaskah kita untuk berdoa, berpuasa, dan beramal. ✝

Diterbitkan oleh: Archdiocesan Pastoral Institute (API) | Emel: api@archkl.org

NEW WAY OF BEING CHURCH

newbec

10 Mac 2024
Hari Minggu Prapaskah ke-4
(Minggu Sukacita (Laetare))

G A R A M D A N T E R A N G D U N I A :
MERAYAKAN, MENDENGAR DAN BERJALAN BERSAMA DALAM SEMANGAT
PERSEKUTUAN, PENYERTAAN DAN MISI (Matius 5:13-16)

FOKUS BULANAN

MENGHIDUPI MISTERI PASKAH

Kebaikan Allah Bersinar Melalui Kita

Minggu Laetare (Sukacita) – Gereja memberikan dorongan ini untuk memastikan kita meneruskan usaha Prapaskah kita. Marilah kita membongkar bacaan hari ini untuk melihat apa yang Tuhan ajarkan kepada kita.

